

## TORITENY - FIANAKAVIANA MASINA - TAONA A



### *Mifohaza hianao, ka ento ny Zazakely sy ny reniny*

Ry Kristianina havana, mankalaza manokana ny fianakaviana masina isika androany dia ny fianakaviana nisy an'i Jesoa, Maria ary Josefa. Fianakaviana masina no iantsoana azy satria eo anivony ilay masina dia i Jesoa. Raha eo anivon'ny fiainantsika tokoa, eo anivon'ny fianakaviana i Jesoa dia masina ny fianakaviantsika tsirairay ary izany no mahatonga atsika milaza fa Eglizy kely ny fianakaviana, Eglizy satria misy an'i Jesoa, Eglizy satria hiarahantsika mivavaka, Eglizy satria handalinantsika ny finoana amin'ny maha Kristianina atsika, Eglizy satria hijoroantsika vavolombelona manambara tahaka ny fianakaviana masina fa eo anivony i Jesoa. Eglizy satria manompo sy manasoa ny hafa tahaka ny fianakaviana masina tao Nazareta.

Raha mankalaza ny fianakaviana masina isika androany dia tsy hoe mahatsiaro ilay fianakaviana masina tao Nazareta fotsiny fa noho ny fanentanan'ny fanahy masina dia tsaroantsika koa ny fianakaviantsika tsirairay ary tena mifandray tokoa amin'ny fankalazana ny Noely izao fankalazana izao satria ny dikan'ny Noely dia Emanoela Andriamanitra eo anivontsika. Ka izany fianakaviana masina tao Nazareta izany no irintsika ho an'ny fianakaviana tsirairay avy mba ho eo anivontsika tokoa i Jesoa.

Vakiteny I : Ekl. 3:2-6,12-14,  
Tononkira : Sal. 128:1-2,3,4-5,  
Vakiteny II : Kol. 3:12-21,  
Evanjely : Mt. 2:13-15,19-23,

Tsy lavitra i Jesoa ary dia mifanaraka tsara amin'ny teny faneva amin'izao taona hiainantsika ny fandalinam-pinoana izao : "I Jesoa velona miara-dàlana amintsika".

Izany no hivavahantsika androany mba ho fianakaviana misy an'Andriamanitra tokoa ny fianakaviansika. Maro ireo ezaka efa nataontsika mba ho fianakaviana masina isika : anisan'izany ny fametrahantsika ny lakroa ao amin'ny tokantranontsika, ny fandraisantsika ny baiboly, ny fanaovantsika isaky ny Asabotsy ny fivavahana miaraka amin'ny fianakaviana.

Tsara hodinihina ihany koa amin'izao fankalazana ny fianakaviana masina izao araky ny fampianarana sy fanantenan'ny Eglizy amin'ny vavaka enontsika tamin'ny fiandohana ny Eokaristia "Ry Andriamanitra Andriananahary mora fo, nomenao ho tahafinay ho ohatra tsara mampirapiratra ny fianakaviana masina "

### **Inona ary ny ohatra velona azontsika sontonina amin'izao fankalazana ny fiananaviana masina izao.**

Maro ny ohatra tsara tiana asongadina sy ny toetra tsara izay azontsika tarafina ary horaisintsika modely amin'ny alalan'ny fianakaviana masina, anisan'izany ireto 4 manaraka ireto :

1- Ny Fianakaviana mivavaka ny fianakaviana tao Nazareta.

Fantantsika fa tsy nitsahatra nanao ny fihaviniana masina tao Jerosalema izy ireo ary anisany anankiray nataony no nisy fanambaran'i Jesoa tao an-tempoly nanambara hoe "Ato amiko ny fanahin'ny tompo, hirahina hitory ny vaovao mahafaly aho"

2- Josefa raim-pianakaviana ohatra amin'ny fitiavam-bady sy fitiavan-janaka ary amin'ny asa atao. Mpandrafitra no nahafantarana azy dia nivelona tamin'izany izy ary nanompo sy nanao soa ny manodidina azy izy araka izany talenta nomen'Andriamanitra azy izany. Izany koa no ohatra ho antsika : Aoka ny raim-pianakaviana rehetra mba ho lehilahy marina tia vady sy hamelona ny vady aman-janaka ao anatin'ny fahamarinana sy fampanjakana ny rariny sy ny hitsiny.

3- Ny fianakaviana manatanteraka ny sitrapon'Andriamanitra.

Fianakaviana mino an'Andriamanitra ary miombona tanteraka ka miaraka manatanteraka ny sitrak'Andriamanitra. Io fianakaviana io dia masina satria eo anivony i Jesoa ary amin'ny alalan'izany no hanatanterahany ny sitrapon'Andriamanitra.

Aoka isika hahay hanatanteraka ny sitrapon'Andriamanitra eo amin'ny fiainantsika.

4- Ny fianakaviana mahay mifanaja

Antitraterin'ny vakiteny voalohany izany ao amin'ny bokin'i Siraka, ohatra ho antsika koa ny Ray aman-dreny manaja zanaka, ny zanaka manaja Ray aman-dReny. Azo lazaina fa tamin'ny alalan'ny fifanajana no niainan'ilay fianakaviana masina tao Nazareta.

Indrisy amin'izao androntsika izao ny fifanajana eo anivon'ny fianakaviana dia toa mihena sy goragora. Miteraka olana eo amin'ny fianakaviana izany satria tsy eo intsony ny fifanajana.

Ny zava-misy aza dia matahotra ny zanaka ny Ray aman-dreny. Nefa araka ny bokin'i Siraka io dia izany fifanajana izany no mitondra amin'ny fahasambarana. Raha tiansika ho sambatra ny fianakaviansika dia aoka hitoetra ao amintsika ny fifanajana. Mifanaja isika raha fianakaviana mivavaka mivavaka ary eo anivontsika Andriamanitra.

Fanomezan'Andriamanitra ny fahendrena ka izany no mahatsara ny hivavahantsika.  
Manamafy an'izany ny fananaran'i Md Paoly ao amin'ny vakiteny faharoa, taratasy ho an'ny kolosiana "Aoka hitafy an'i Kristy isika, hitafy ny fitiavany izay feno ny hatsaram-panahy rehetra."  
Satria mitafy an'i Kristy isika ka mitafy ny fitiavana.

Araka ny efa nolazaintsika teo dia ataontsika eo anivon'ny fiainantsika ary ivom-piainantsika i Kristy ka amin'izay ny ankohonam-piainantsika ho Eglizy tokoa, Eglizy kely ka hahat hifanaja, hifanao soa ary dia zary fahazavana sy fanasina isika ho an'ireo manodidina atsika.

Ry Jesoa Kristy zokinay ô, nanaiky ho tonga olombelona ianao ary dia mbola anatin'ny fankalazana ny noely izahay, Emanoela ianao, Andriamanitra eto anivonay ianao koa enga anie ho eo anivon'ny fianakaviana tsirairay ka amin'izay hahalala ny farantampon'ny fahalalana izahay dia ny fahendrena. Raha feno fahendrena izahay dia hifanaja ary hifanao soa, hiasa, hanatanteraka ny sitraponao ka zary fahazavana sy fanasina ho an'ireo manodidina anay. Arotsahy amin'ny fianakavianay tsirairay avy ny tsodranonao ka hitoetra sy hivelatra ary hamokatra ho an'ireo manodidina anay izahay.  
Amen

Mompera Arseveka Mgr Benjamin Ramaroson